

Consello Galego dos Procuradores

SERVICIO PÚBLICO DE MEDIACIÓN INTRAJUDICIAL DEL CONSELLO GALEGO DE PROCURADORES

2.- Protocolo entre a Vicepresidencia y la Consellería de la Presidencia, Administraciones Públicas e Xustiza da Xunta de Galicia, para la colaboración en materia de Mediación en el ámbito Civil y Mercantil, de fecha tres de Diciembre de 2014.



XUNTA DE GALICIA



PROTOCOLO ENTRE A VICEPRESIDENCIA E CONSELLERÍA DE PRESIDENCIA, ADMINISTRACIÓNS PÚBLICAS E XUSTIZA DA XUNTA DE GALICIA E O CONSELLO GALEGO DOS PROCURADORES PARA A COLABORACIÓN EN MATERIA DE MEDIACIÓN NO ÁMBITO CIVIL E MERCANTIL

Santiago de Compostela, 3 de decembro de 2014

REUNIDOS

Dunha parte, D. Alfonso Rueda Valenzuela, vicepresidente e conselleiro de Presidencia, Administracións Públicas e Xustiza, cargos que ocupa en virtude dos nomeamentos realizados polos decretos 229/2012 e 230/2012, ambos do 2 de decembro de 2012.

E doutra, D. Ricardo Garrido Rodríguez, presidente do Consello Galego dos Procuradores, cargo que ocupa en virtude do nomeamento efectuado por acordo da sesión do Pleno do Consello de data do 26 de Setembro de 2014.

EXPOÑEN:

I. A Lei 5/2012, do 6 de xullo (BOE do 7 de xullo), regula a mediación en asuntos civís e mercantís incorporando ao Dereito español a Directiva 2008/52/CE (DOUE do 24 de maio de 2008), que aprobou para o ámbito europeo o establecemento da mediación como medida para a resolución de asuntos civís e mercantís, de entre outros incluídos na denominada "ADR" (*Alternative Dispute Resolution*). Así mesmo o Real decreto 980/2013, do 13 de decembro, desenvolve determinados aspectos da Lei 5/2012, do 6 de xullo, de mediación en asuntos civís e mercantís.


galicia



Unha das funcións esenciais do Estado de dereito é a garantía da tutela xudicial dos dereitos dos cidadáns. Esta función implica o reto da implantación dunha Xustiza de calidade capaz de resolver os diversos conflitos que xorden nunha sociedade moderna e, á vez, complexa.

Neste contexto, dende a década dos anos setenta do pasado século veuse recorrendo a novos sistemas alternativos de resolución de conflitos, entre os que destaca a mediación, que foi cobrando unha importancia crecente como instrumento complementario da Administración de xustiza.

O obxectivo de asegurar un mellor acceso á Xustiza como parte da política da Unión Europea encamiñada a establecer un espazo de liberdade, seguridade e xustiza debe abranguer o acceso a métodos tanto xudiciais coma extraxudiciais de resolución de litixios.

II. Entre as vantaxes da mediación cómpre destacar a súa capacidade para dar solucións prácticas, efectivas e rendibles a determinados conflitos entre partes, o que a configura como unha alternativa ao proceso xudicial ou á vía arbitral, dos que se debe deslindar con claridade. A mediación está construída arredor da intervención dun profesional neutral que facilita a resolución do conflito polas propias partes dunha forma equitativa, permitindo o mantemento das relacións subxacentes e conservando o control sobre o final do conflito.

A mediación pode proporcionar unha solución extraxudicial económica e rápida a conflitos en asuntos civís e mercantís, mediante procedementos adaptados ás necesidades das partes. É máis probable que os acordos resultantes da mediación se cumpran voluntariamente, e tamén que se manteña unha relación amigable e viable entre as partes. Estes beneficios son aínda máis perceptibles en asuntos que teñan carácter transfronteirizo.

III. O Consello Galego de Procuradores da Comunidade Autónoma de Galicia é unha corporación de dereito público integrada polos colexios de procuradores da Coruña, Lugo, Ourense, Pontevedra, Santiago de Compostela e Vigo (Decreto 248/2000, do 29 de setembro, polo que se aproba a creación do Consello Galego



galicia



de Procuradores, DOG do 19 de outubro). Correspóndelle ao seu presidente, entre outras funcións, exercer a representación do Consello, estando asignado o exercicio de cantos dereitos e funcións lle atribúan o seu estatuto e as relacións cos poderes públicos, entidades, corporacións e persoas xurídicas ou naturais de calquera orde, sempre que se trate de materias de carácter xeral para a profesión, dentro do ámbito do Consello e sexan da competencia dos organismos autonómicos.


A Lei 5/2012, do 6 de xullo, de mediación de asuntos civís e mercantís, no seu artigo 5.1 dispón que poderán ser institucións de mediación as entidades públicas ou privadas, españolas ou estranxeiras, e as corporacións de dereito público que teñan entre os seus fins o impulso da mediación. Ao abeiro da devandita norma, tendo en conta que o Consello Galego ten natureza dunha corporación de dereito público, e conscientes da importancia e transcendencia da mediación como medio extraxudicial de resolución de conflitos, está no ánimo dos seus conselleiros constituír o Consello Galego de Procuradores en institución mediadora, e para tal fin na sesión de data do 10 de xaneiro do 2014 aprobouse a modificación do apartado cuarto do artigo 5 do Decreto 248/2000 para incluír entre as súas finalidades e funcións a arbitrase e o fomento da mediación.

IV. O Estatuto de autonomía da Comunidade galega, aprobado pola Lei orgánica 1/1981, do 6 de abril, establece no seu artigo 20.1 que en relación coa Administración de xustiza, exceptuada a militar, lle corresponde á Comunidade exercer todas as facultades que as leis orgánicas do poder xudicial e do Consello Xeral do Poder Xudicial recoñezan ou atribúan ao Goberno do Estado.

V. O Consello Galego dos Procuradores é consciente da importancia do fomento da mediación como método de resolución de conflitos, e como corporación de dereito público que ten entre as súas finalidades e fins o impulso da mediación, iniciou unha serie de actuacións co obxectivo de promover a cultura da mediación, de conformidade coas liñas de actuación marcadas polo Consello Xeral de Procuradores de España nesta materia, que xiran sobre dous piares básicos: o primeiro deles é a formación do colectivo de procuradores galegos,





 galicia

polo que a través da Escola de Formación Continua para Procuradores, que se encadra dentro do convenio marco suscrito entre as tres universidades galegas e o Consello, se garante tanto a formación inicial coma a formación permanente dos profesionais; o segundo é a creación do servizo de mediación do Consello Galego dos Procuradores, a través do cal se asumirán as funcións de mediación previstas na lei.

VI. O modelo de mediación baséase na voluntariedade e libre decisión das partes e mais na intervención dun mediador, de quen se pretende unha intervención activa orientada á solución da controversia polas propias partes. O réxime baséase na flexibilidade e no respecto á autonomía da vontade das partes, favorecendo esta alternativa fronte á solución xudicial do conflito. É aquí onde se encontra, precisamente, un dos eixes da mediación, que é a deslegalización ou perda do papel central da lei en beneficio dun principio dispositivo que rexe tamén nas relacións que son obxecto do conflito.

A figura do mediador é a peza esencial do modelo, posto que é quen axuda a atopar unha solución dialogada e voluntariamente querida polas partes.

Tense presente o papel, moi relevante neste contexto, dos servizos e institucións de mediación, que desempeñan unha tarefa fundamental á hora de ordenar e fomentar os procedementos de mediación.

De acordo coas manifestacións anteriores, as partes recoñécense mutuamente a capacidade legal necesaria, e sen prexuízo da normativa autonómica que se elabore en materia de mediación civil e mercantil,

ACORDAN:

Primeiro.- Obxecto.

O obxecto do presente protocolo é establecer un marco estable e permanente de colaboración entre a Vicepresidencia e Consellería de Presidencia, Administracións Públicas e Xustiza e o Consello Galego dos Procuradores, co fin



de potenciar e consolidar a mediación como modalidade alternativa de solución de conflitos cuxa xurisdición corresponda aos xulgados do mercantil e civil no ámbito da Comunidade galega.

Para estes efectos, enténdese por mediación aquel medio de solución de controversias, calquera que sexa a súa denominación, no cal dúas ou máis partes intentan voluntariamente alcanzar por si mesmas un acordo coa intervención dun mediador.

O mediador, de acordo coa súa conformación natural, é quen axuda a encontrar unha solución dialogada e voluntariamente querida polas partes, e non pode ter funcións decisorias, pero si de xestión do procedemento.

Segundo.- Actuacións ou compromisos das partes.

A. DO CONSELLO GALEGO DOS PROCURADORES

Servizo de mediación do Consello Galego dos Procuradores

A mediación que realizará o Consello Galego de Procuradores comprenderá os servizos de mediación intraxudicial e extraxudicial, en materia civil e mercantil.

O servizo de mediación intraxudicial entenderá daqueles asuntos que se encontren inmersos na vía xurisdiccional, ofrecendo unha alternativa a esta para as partes.

O servizo de mediación extraxudicial entenderá de todos os demais asuntos que non se encontren no apartado anterior.

O servizo de mediación do Consello Galego dos Procuradores ofrecerá o persoal cualificado para a prestación do servizo de mediación intraxudicial e extraxudicial.



O servizo de mediación intraxudicial será gratuíto para a Administración e os usuarios. Con carácter inicial, e sen prexuízo dos futuros convenios que poidan chegar a subscribirse ou de que a mediación sexa incluída entre as prestacións do artigo 6 da Lei 1/1996, do 10 de xaneiro, de asistencia xurídica gratuíta, o mediador non recibirá retribución polos seus servizos. O servizo de mediación intraxudicial requirirá a anuencia da Administración de xustiza, que prestará o seu consentimento a través da/s autoridade/s competente/s.

Os mediadores do Servizo de Mediación do Consello Galego de Procuradores que presten seus servizos de modo gratuíto poderán obter unha certificación oficial da súa participación en cada asunto que lles reportará o prestixio de ser colaboradores cos Tribunais de Xustiza.

O servizo de mediación extraxudicial será gratuíto para aqueles usuarios que nun procedemento xudicial estarían en condicións de ser beneficiarios de asistencia xurídica gratuíta. Para os usuarios non comprendidos no apartado anterior estableceranse de común acordo as tarifas do prezo do servizo. O servizo de mediación extraxudicial non terá custo ningún para a Administración, sen prexuízo dos futuros convenios que poidan chegar a subscribirse ou de que a mediación sexa incluída entre as prestacións do artigo 6 da Lei 1/1996, do 10 de xaneiro, de asistencia xurídica gratuíta. O mediador recibirá a retribución que corresponda con cargo ás tarifas establecidas.

A prestación do servizo público de mediación é compatible coa actividade privada do servizo de mediación do Consello Galego dos Procuradores.

O servizo de mediación do Consello Galego dos Procuradores realizará un seguimento dos asuntos que tivesen entrada. Neste sentido, e especialmente:

- Para unha mellora da calidade do servizo, os usuarios avaliarano a través dun cuestionario no cal se incluírán indicadores que axuden a valorar os diversos aspectos do servizo.



- O equipo de mediación confeccionará as estatísticas das mediacións co fin de obter datos e porcentaxes sobre os resultados obtidos nos procedementos derivados ou extraxudiciais, facendo constar indicadores das materias, se se produciu ou non aceptación da mediación, se houbo ou non acordo en mediación ou posteriormente, se se abandonou ou non a mediación, etc.
- Os equipos de mediación remitirán semestralmente ao Consello Xeral do Poder Xudicial as fichas de control estatístico das operacións de mediación realizadas.

Formación

O Consello Galego dos Procuradores organizará cursos formativos para os efectos de acreditar a formación específica que permita exercer a mediación no ámbito de aplicación deste protocolo, dirixidos a aqueles colexiados que non achegasen a documentación acreditativa da dita formación no momento de entrar a formar parte do servizo de mediación como mediadores, en virtude do disposto no artigo 11.2 da Lei 5/2012, do 6 de xullo, de mediación en asuntos civís e mercantís, e, se for caso, do establecido no seu desenvolvemento regulamentario.

Estes cursos proporcionaranlles aos mediadores os necesarios coñecementos xurídicos, psicolóxicos, de técnicas de comunicación, de resolución de conflitos, de negociación e de ética da mediación, tanto a nivel teórico coma práctico.

Os mediadores axustarán a súa actuación ao disposto na Lei 5/2012, do 6 de xullo, de mediación en asuntos civís e mercantís, así como ao establecido no Real decreto 980/2013, do 13 de decembro, polo que se desenvolven determinados aspectos da lei, adheriranse ao Código de conduta europea e subscribirán o compromiso de confidencialidade e mais o seguro de responsabilidade civil.

B. DA XUNTA DE GALICIA

Correspóndelle á Xunta de Galicia, a través da Vicepresidencia e Consellería de Presidencia, Administracións Públicas e Xustiza, a promoción da mediación, en


galicia



particular a intraxudicial, tanto en conflitos que se diriman ante a xurisdición civil coma ante a mercantil, para o cal colaborará na difusión e divulgación entre os órganos xurisdicionais e a cidadanía da información relativa a este servizo.

A Xunta de Galicia porá á disposición do servizo de mediación do Consello Galego dos Procuradores un local e os demais medios materiais que permitan a xestión administrativa do servizo e á vez constitúan o marco axeitado para o éxito do obxectivo.

Terceiro.- Competencia.

A derivación á mediación polos xulgados con competencia en materia civil e mercantil de Galicia, agás acordo das partes en litixio, poderase realizar, no marco do establecido no presente protocolo de colaboración, ao servizo de mediación do Consello Galego dos Procuradores.

Cuarto.- Comisión Mixta de Coordinación e Seguimento.

Calquera circunstancia relativa ao desenvolvemento e interpretación do presente protocolo deberá ser tratada pola Comisión Mixta de Coordinación e Seguimento que para tal efecto se constituirá, e da que formarán parte dous membros de cada unha das institucións asinantes.

A devandita comisión estará presidida por un representante da Vicepresidencia e Consellería de Presidencia, Administracións Públicas e Xustiza.

A comisión reunirse, a pedimento de calquera das partes asinantes, polo menos unha vez ao ano.

Quinto.- Réxime económico.

O presente protocolo de colaboración carece de contido económico por non comportar prestacións económicas entre as partes asinantes, sendo o Consello Galego dos Procuradores quen fornecerá os recursos humanos para a práctica


galicia



das mediacións, sen prexuízo dos custos que se poidan establecer e que en todo caso serán por conta das partes en conflito.

Sen prexuízo do que se acaba de dicir, o contido do presente protocolo poderá formar parte dun plan de actividade neste ámbito que poida ser dotado economicamente polas administracións públicas correspondentes.

Sexto.- Réxime xurídico aplicable e incompatibilidades.

A mediación civil e mercantil, ademais de polo disposto na normativa de carácter xeral, rexerá polo Regulamento de mediación que teña vixente o Consello Galego dos Procuradores, que figura como anexo a este protocolo de colaboración.

O mediador non poderá iniciar a mediación, ou deberá abandonala, cando concorran circunstancias que poidan afectar á súa imparcialidade ou xerar un conflito de intereses. Serán motivos de incompatibilidade que obrigarán a renunciar á realización da mediación os seguintes:

- Ter vínculo de parentesco por consanguinidade ou afinidade ata o cuarto grao con algunha das partes intervinientes na mediación, ou cos seus asesores, representantes legais ou mandatarios, así como compartir o despacho profesional ou estar asociado con estes para o asesoramento, a representación ou o mandato.
- Ter intervido profesionalmente con anterioridade no asunto obxecto de mediación.
- Ter interese directo, de calquera tipo, no asunto obxecto da súa actuación, ou unha manifesta vinculación –directa ou indirecta– económica, profesional, laboral ou doutro tipo que poida comprometer a súa independencia profesional.



- Calquera outro suposto establecido legal ou regulamentariamente.

Sétimo.- Difusión.

As partes, previamente postas de acordo, poderán, con estrito cumprimento da Lei de protección de datos, publicar e divulgar os resultados das actuacións desenvoltas ao abeiro do presente protocolo de colaboración. Os documentos que recollan as accións que se desenvolvan en execución deste protocolo deberán levar o logotipo e denominación das partes asinantes, así como daqueloutras administracións e entidades que se poidan sumar a el.

Oitavo.- Duración e extinción do protocolo de colaboración.

O presente protocolo entrará en vigor o día seguinte ao da súa sinatura e terá unha vixencia indefinida, agás denuncia expresa de calquera das partes que se deberá notificar ás restantes partes cunha antelación mínima de tres meses.



O protocolo extinguirase por denuncia dalgunha das partes, polo común acordo entre estas ou polo incumprimento das obrigas asumidas nel.

Noveno.- Solución de controversias, réxime xurídico e orde xurisdiccional competente.

O presente protocolo de colaboración ten natureza administrativa, formalizándose ao abeiro do establecido no artigo 6 da Lei 30/1992, do 26 de novembro, de réxime xurídico das administracións públicas e do procedemento administrativo común. A posibilidade de subscribir un protocolo como o de referencia aparece considerada –como materia exceptuada da normativa reguladora da contratación administrativa– no artigo 4.1, letras c) e d), do Real decreto legislativo 3/2011, do 14 de novembro, polo que se aproba o texto refundido da Lei de contratos do sector público.

De aí que, sen prexuízo da actuación da Comisión Mixta de Coordinación e




10  galicia

Seguimento a que se refire a cláusula cuarta, que resolverá de común acordo as diverxencias que puidesen xurdir na aplicación e execución deste protocolo, o coñecemento das cuestións litixiosas que se poidan producir como consecuencia da súa execución corresponderalle á xurisdición contencioso-administrativa.



Décimo.- Cláusula derradeira.

A sinatura do presente protocolo de colaboración non é óbice para o establecemento ou ampliación de relacións de colaboración no ámbito da mediación con outras entidades ou institucións, nin exclúe a súa incorporación a este protocolo ou a sinatura de calquera outro de similar natureza.

Polo que atinxe ao non disposto no presente protocolo, atenderase ao establecido na Lei 5/2012, de mediación en asuntos civís e mercantís, e nas súas normas de desenvolvemento.


De conformidade con canto antecede, no exercicio das atribucións de que son titulares os asinantes, e obrigando deste xeito ás institucións representadas, subscriben o presente protocolo de colaboración por duplicado no lugar e data arriba indicados.

Pola Vicepresidencia e Consellería de
Presidencia, Administracións Públicas e
Xustiza



Alfonso Rueda Valenzuela

Pola Presidencia do Consello Galgo
dos Procuradores



Ricardo Garrido Rodríguez